

官板

東華錄

西曆製本

六

漢書門			
三	九	九	七
一	四	三	七
六	二	三	七
冊	架	函	號

內閣文庫			
三	九	九	七
一	四	三	七
六	二	三	七
冊	架	函	號
漢書			

內閣文庫	
番號	漢 3997
冊數	16 ( 6 )
函號	286 91




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM Kodak





東華錄卷之六

湘源

蔣良騏千之父

順治十八年正月。遺詔命內大臣索尼。蘇克薩哈。遏必隆。鰲拜。為輔臣。保翊冲主。佐理政務。七日丁巳。夜子刻。上崩於養心殿。聖祖合天弘運文武睿哲。恭儉寬裕。孝敬誠信。中和功德大成。仁皇帝。諱上字。从山从彡。下字从火从華。章皇帝第三子也。母孝康。慈和莊懿。恭惠溫穆。崇大育聖。章皇后佟氏。一等公。謚勤襄。佟國賴女。年十五。誕上于景仁宮。乃順治十

一年甲午三月十八日巳時也先是孝康衣裾若有龍繞太皇太后謂近侍曰朕曩孕皇帝時左右嘗見裾袖間有龍盤旋赤光燦爛後果誕聖子今妃亦有此祥徵至誕辰合宮異香經時不散又五色光氣充溢庭戶與日並耀上天表奇偉神采煥發雙瞳日懸隆准岳立耳大聲洪徇齊天縱稍長舉止端肅志量恢宏語出至誠切中事理讀書十行俱下畧不遺忘自五齡後好學不倦六齡時世祖問其志待長而效法皇父八齡踐祚後太皇太后問何欲曰惟願天

下人安生民樂業共享太平之福而已順治十八年正月七日丁巳夜子刻章皇帝賓天先五日壬子不豫丙辰遂大漸召學士麻勒吉王熙至養心殿定上御名立為皇太子令草遺詔命大臣索尼蘓克薩哈遏必隆鰲拜輔政四臣誓告於天大行皇帝神位前初九日巳未上即皇帝位以明年為康熙元年赦天下甲子王以下及大臣官員齊集正大光明殿誓告於天大行皇帝神位前上大行皇帝尊謚曰體天隆運英睿欽文大德弘功至仁純孝章皇帝廟號世祖

東華錄 卷六  
二月壬午移梓宮景山壽皇殿。添設六科滿洲官各二員。三月添設五城滿御史一員。每城二員四月以副都統三等伯線國安鎮守廣西。吏部尚書伊圖等題為本年三月奉旨。院官員罰土黑勒威勒者不倫。有前程與白身應照職任處罰。或任大罰少。或任小。照前程罰多。似屬不均。爾部照依職任大小。分別議奏。欽此。臣等謹遵旨議得。凡部院尚書有一品二品者。侍郎有二品三品者。郎中有三品四品者。五品者。員外郎有四品五品者。主事有四品五品六品者。

其品級先後所定之例雖異。俱因除授部院之職。支俸為部院事務。罰土黑勒威勒。俱各照職俸。每十兩罰一兩。若此。內除部院職任之外。有大任大前程者。除大任大前程之俸。亦照依部院職任。按俸處罰。可也。奉旨依議。紅本五月奉天府尹張尚賢言。盛京形勢。自興京至山海關。東西千餘里。開原至金川。南北亦千餘里。又有河東河西之分。以外而言。河東北起開原。由西南至黃泥窪牛莊。乃明季昔日邊防。自牛莊由三岔河南至蓋州。復州金州旅順。轉而東至紅

東華錄 卷六  
嘴歸復黃骨島鳳凰城鎮江鴨綠江口。皆明季海防。此河東邊海之大畧也。河西自山海關以東。至中前所前中後所沙河寧遠連山塔山杏山松山錦州大凌河。北面皆邊。南面皆海。所謂一條邊耳。獨廣寧一城。南至閭陽驛拾三山站右屯衛海口。相去百餘里。北至我朝新插之邊。相去數千里。東至盤山驛高平沙嶺。以至三分河之馬圈。此河西邊海之大畧也。合河東河西之邊海以觀之。黃沙滿目。一望荒涼。倘奸賊暴發。海寇突至。此外患之可慮者。以內而言。河東

城堡雖多。皆成荒土。獨奉天遼陽海城三處。稍成府縣之規。而遼海兩處。仍無城池。如蓋州鳳凰城金州。不過數百人。鉄嶺撫順。惟有流徙諸人。不能耕種。又無生聚。此河東腹裏之大畧也。河西城堡更多。人民稀少。獨寧遠錦州廣寧。人民湊集。僅有佐領一員。此河西腹裏之大畧也。合河東河西之腹裏觀之。荒城廢堡。沃野千里。有土無人。此內憂之甚者。欲弭外患。必當籌畫隄防。欲消內憂。必當充寔根本。以圖久遠之策。下部議。逆渠鄧耀竊踞廣東廉州之龍門。至


是官兵擊擒之。諭工部朝房尚未全脩未肅觀瞻。兩傍空地著俱蓋造。八月加太祖尊謚為二十字。太宗尊謚為十八字。復內三院秘書國史弘文舊制設滿漢大學士等。照尚書侍郎品級。其內閣翰林院名色俱停罷。罷政士觀政例。川陝督李國英報擒逆賊郝承裔。閏七月海澄公黃梧招撫鄭芝龍屬下偽都督萬儀萬祿等投誠。九月吏部遵旨詳查太祖太宗滿洲守制舊例。吏禮二部並無舊冊可查。惟順治十年二月禮部覆御史陳啓泰請行通制一疏。

奉旨三年喪禮著照會典定例遵行。有難拘常制者請旨定奪之旨。又順治十年六月臣部題滿洲蒙古漢軍各官不便離任丁憂奉旨依議之旨遵行已久。今議得在京部院滿洲蒙古漢軍大小文官仍應照定例守制一月。服滿即出理事。私居持服。盡三年喪禮外。其奉差出兵文官。以回京聞喪之日為始。亦照定例遵行。至各省駐防及在外出任漢軍文官。伊父母在任病故也。仍應照例遵行。父母在京病故者。准其解任回京。以到日為始。守制半年。仍私居持服。盡

三年喪禮所遣員缺相應另補後之十月吏部題直隸已設總督其順天保定兩巡撫應裁去一員得旨順天巡撫著裁去鄭芝龍并其子鄭世恩世蔭等照謀叛律族誅尊皇祖妃為壽康太妃登州于七捕名小喜本捕快作亂焚劫八邑命都統濟世哈為靖東將軍征剿將各旗兵馬分駐登萊膠三處防範海汎并緝于逆紅本

康熙元年二月吳三桂愛星阿奏奉命征緬兩路進兵於順治十八年十一月會師木邦偽晉王李定國

奔景線偽鞏昌王白文選遁據錫波江官兵造筏將渡文選復奔茶山邊總兵馬寧等追及於孟養文選降三桂愛星阿自趨緬城十二月初一日大軍至緬城緬酋執朱由榔獻軍前殺偽華亭侯王惟恭等一百人滇南平三月諭兵部向來綠旗武官叙功加至左都督仍應加級者授官保銜以後改授世職尊世祖章皇帝陵曰孝陵四月加上太祖武皇帝尊謚曰承天廣運聖德神功肇紀立極仁孝睿武弘文定業高皇帝加孝慈武皇后尊謚曰孝慈昭憲敬



順慶顯承天輔聖高皇后。太宗尊謚曰應天興國弘德彰武寬溫仁聖睿孝隆道顯功文皇帝。四川總督李國英報擒偽石泉王朱奉鎔。恢復兩郡。五月。都統濟席哈蕩平山東賊寇。班師。摠兵許龍擒海寇鄭成功之弟鄭成。賜於廈門。六月。耿繼茂報海逆鄭成功。因其子鄭錦為各偽鎮擁立。忿怒發狂。於五月初八日。齧指身死。十月。尊上聖祖母皇太后。曰昭聖慈壽恭簡安懿章慶敦惠太皇太后。母后皇太后曰仁憲皇太后。母后曰慈和皇太后。頒恩詔。定

西將軍內大臣公愛星阿平定雲南凱旋。雲撫袁懋功疏報。偽晉王李定國逃奔景線。染病身死。十一月。授偽鞏昌王白文選為承恩公。十二月。河南提督許天寵言。各府州縣當設公衙門。命文武各官。五日一會兵民。有不便者。有司官將面議。兵部議從之。諭貴州一切文武官員。兵民事務。俱照雲南例。著平西王管理。康熙二年二月。湖廣提督董學禮疏報。前奉命會勦湖廣西山寇李來亨。馬騰雲。党守素等。隨同總兵穆



生輝于大海高守貴鑿山開道追至李家店擒偽總  
兵宋段斬獲無算賊焚巢遁又別將恢復歸州巴東  
巫山等處陝督奏授臣王一正率總兵于奮起鮑敬  
進剿逆賊郝搖旗於房縣橫水敗偽軍門羅公  
二月庚戌亥刺慈和皇太后崩兵部議准將雲貴  
一省總督巡撫勅書撰入聽平西王節制字  
三月  
命廣東總督移駐廣州府川督報偽岐侯賀珍子  
偽富平伯賀道寧納款四月湖督報提督董學禮  
同各鎮大破李來亨於長坪六月兵部議覆李定

國子李嗣興從邊外投誠得旨授都統品級八月  
禮部議覆鄉會考試停止八股文頭場策五篇二場  
四書本經論各一篇表一篇判五道以甲辰科為始  
從之  
以流賊餘孽郝搖旗劉體純李來亨等竄伏  
鄖襄山中命都統穆里瑪為靖西將軍都統圖海為  
定西將軍同都統宗室穆琛護軍統領孫達里都統  
覺羅巴爾布護軍統領科爾昆率大兵往剿九月  
命都統噶褚哈為鎮西將軍同副都統光泰統滿兵  
鎮守西安以西安將軍傅喀禪征西山故也十月

川督李國英報。巨寇劉二虎李來亨郝搖旗袁宗第  
黨守素塔天寶馬騰雲七家。出犯巫山。乞發大兵剿  
滅。福督李率奏。官兵會剿。延建賊首王鉄佛等  
擒之。又疏報提督施琅遣守備汪明等。敗海寇於  
海門。斬偽副將林維等。十一月。刑部議覆。原任按  
察使宋琬。通同于七謀反一案。旨宋琬等原無通賊  
情節。著免罪。十二月。耿繼茂李率奏。十月。臣等  
統兵渡海。攻克廈門。賊衆驚潰。登州提督施琅。會荷  
蘭國夾板船。邀擊之。斬千餘級。乘勝取浯嶼金門二

島。鄭錦周全斌等遁。耿繼茂奏。十月。總兵王進功  
敗海寇于雲霄鎮。康熙三年正月。川督李國英報。西安將軍傅喀禪副  
都統杜敏會同提督進剿。蜀中巨寇。於康熙二年十  
二月廿三日。師次陳家坡。奮勇剿殺。賊遁入天池寨。  
杜敏等統兵追剿。劉二虎勢窮自縊。郝搖旗袁宗第  
夜遁。杜敏等復追至黃草坪。大敗賊衆。擒郝搖旗袁  
宗第。並偽晉王朱宗滾等。吳三桂疏。追剿廣西隴  
納山寇。生擒妖人阿仲。逆寨悉平。二月。耿繼茂疏。

官兵攻克長腰東蚶二島。偽兵部阮春雷逆渠張煌  
言僅以身免。西山巨逆馬騰雲黨守素塔天寶歸  
誠。三月。吏部奉上諭議。大學士缺。以各部尚書左  
都御史推補。如不用。以各部侍郎學士推補。各部尚  
書缺。照衙門次序。以尚書左都御史推補。如不用。以  
各部侍郎推補。吏侍缺。以各部侍郎轉。各部侍郎缺。  
以學士左副都御史使大理卿宗丞推。如不用。以府  
尹太常寺推。左副都缺。以通政使大理卿宗丞推。如  
不用。以府尹太常卿推。如不用。以光祿卿推。如不用。


以左通推。通政使大理卿缺。以府尹太常卿推。如不  
用。以光祿卿推。如不用。以侍讀學士左右政大理少。  
照考語俸次推。府尹太常卿缺。以光祿卿推。如不用。  
以左右通大理少推。如不用。以太常少鴻臚卿太僕  
少督捕理事官。照考語俸次推。光祿卿缺。以左右通  
理少推。如不用。以常少僕少鴻臚卿督捕理事官。照  
考語俸次推。其小四品京堂缺。將每年內陞京官四  
員。用完。後用五品京堂一員。再用內陞司道一員。得  
旨。學士既推侍郎以後。大學士缺。停其推用。餘依議。

四月定例公以下副都統以上出征臨陣接戰時墜馬人有以馬與騎者獎賚銀一百兩叅領以下銀六十兩平人銀二十兩康熙七年八月兵部尚書噶楚哈龔鼎孳等議復崇德年間例副都統以上衣服一襲馬一匹叅領佐領馬一匹白身給牛一頭奉旨太宗時因馬牛價貴獎勵以馬與墜落之人騎者定有給衣服馬牛之例今馬牛價值甚賤如仍照舊例屬輕者照現行例行本紅五月耿繼茂疏報三月初六日與督臣李率泰提臣王進功海澄公黃梧等領

兵先後至八尺門偽將軍翁求多率兵民六萬降十四夜半渡海進拔銅山降偽侯黃廷偽都督余寬等兵民三萬餘口鄭錦遁走臺灣命廣西總督自梧州移駐省城七月以福建提督水師總兵官施琅為靖海將軍往剿鄭錦八月浙督趙廷臣疏逆渠張煌言盤踞浙海多年抗不就撫借名歸隱倘徉海外臣密令將備徐元張公午扮成僧民獲活口林生陳滿等知煌言見在懸山花島即駕所獲賊艘乘夜進一小港從山後覓路突入帳房遂擒煌言及其親

信餘黨。搜出視偽師兵部銀方印一顆。偽關防九顆。湖廣督張長庚疏。李來亨擁眾茅麓山。最為峻險。靖西將軍穆里瑪定。西將軍圖海等。率禁旅與三省兵合剿。晝夜環攻。來亨窮迫自縊。舉火焚巢。餘黨蕩平。十月。彗星見翼宿度。指西北方。先是給事中楊勗劾奏。康熙二年。順天鄉試春秋題目。邾子誤邾子。將考試官白乃身。啓養沈。同考官羅繼謨。卓職。尋命將貼出。寫子字。三人覆試。俱不合式。不錄。八旗都統以下武職官員。鎮守省城將軍以下武職各官。

順治年間。俱由吏部題補。康熙三年。歸併兵部。紅本十一月。穆里瑪等班師。彗星犯井宿。丙午。彗犯胃宿。尾指東北。十二月。壬戌。彗在奎宿度。形漸小。給事中楊雍正言。本年十月初旬。彗星見。今五十餘日。歷一十三宿。竊念上天垂象示警。乞力圖脩省。廣求直言。無難轉災為福。得旨。楊雍正直言可嘉。今惟力圖脩省。以合天心。甲戌。金星生白氣。長三丈。康熙四年二月。吳三桂奏。總兵李世耀等。於三年十一月。自烏蒙進征水西。大破之於波羅箐。追至法地。



屯山擒安地。己巳彗星見女度。三桂報官兵進克烏撒。土酋安重聖安重乾就擒。暹羅國王森列拍臘照右龍拍臘馬嘑陸坤司由提呀菩埃遣陪臣航海具表進貢。乙酉彗星在壁一度三十分尾長五尺餘求直言。三月戊子午刻京師地震有聲。己丑彗星行入奎宿下詔肆赦。辛卯金星晝見。密諭尚可喜嚴束所屬官兵以廣東人民為王下兵丁擾害甚苦失其生理也。復科場經書策論三場舊制。從侍郎黃機言也。六月吳三桂言逸東土酋

王耀祖等。本年三月竊據新興。僭號大慶。謀犯省城。分遣賊黨攻陷各府縣。總督卞三元等分兵剿捕。四月初七日擒耀祖。各州縣俱恢復。八月庚申廣東陽江縣地震有聲。九月田申山西太原府地震。九月初八日辛卯上大婚禮成。皇后何舍里氏內大臣噶布喇女。九月二十五日加上太皇太后徽號曰昭聖慈壽恭簡安懿章慶敦惠溫莊。加二字太皇太后。皇太后徽號曰仁憲恪順。加二字皇太后。恩款五條。十月丁丑戌時湖廣常德府地震有聲。十二月丙

江督卽廷佐報。深陽縣民獲玉璽篆文。人心惟危。至  
允執厥中十六字。命貯內庫。賞獲璽人顧起龍等各  
銀五十兩。

康熙五年六月。添設六科滿漢給事中各一員。八  
月。給事中張維赤請擇吉親政。報聞。十一月。先是  
睿親王將鑲黃應得之地。給與正白旗。而給鑲黃旗  
地於右翼之末二十餘年。旗民安業。及鑲黃旗鰲拜  
與正白旗蘇克產哈同輔政。有隙。鰲拜故意更換。  
命大學士蘓納海侍郎雷虎會同巡撫王登聯總督

朱昌祚酌議圈換。至是昌祚登聯言。圈地不便。旗民  
交困。請停止。輔臣稱旨。將蘇納海昌祚登聯皆拿禁。  
十二月。刑部議蘇納海撥地遲誤。朱昌祚王登聯  
紛更妄奏。應鞭一百。籍家產。上召輔臣詢問。蘇克薩  
哈不對。鰲拜索尼過必隆堅奏。應置重典。上未允。鰲  
拜出。稱旨蘇納海朱昌祚王登聯情罪重大。著卽處  
絞。籍家產。

康熙六年正月。定王身勒等執事人役衣服俱用綠  
色。二月。吳三桂報官兵進剿烏撤。生擒女酋隴氏。

及逆黨萬餘。四月江南奸民沈天甫呂中夏麟奇等撰逆詩二卷。詭稱黃尊素等百七十人作。陳濟生編輯。故明大學士吳姓等六人為之序。沈天甫使夏麟奇詣吳姓之子中書吳元萊所。詐索財物。元萊察其書非父手蹟。控於巡撫御史以聞。下所司鞫訊。沈天甫等皆棄市。其被誣者悉不問。刑部議覆。御史田六善疏言。近見奸民捏詞詐害。在南方不曰通海。則曰逆書。在北方不曰于七賊黨。則曰逃人。謂非此不足以上聳天聽。下怖小民。請敕督撫即與審理。情

寔者。據寔奏聞。情虛者依律反坐。如不候督撫審結。徑來叩關者。依光棍例治罪。查定例。不俟原官審結。徑行叩關者。旗人枷號兩月。鞭一百。民責四十板。流三千里。從之。五月丙午。諭吏部等衙門。民為邦本。必使家給人足。安生樂業。方可稱太平之治。近聞直隸各省。民多失所。疾苦顛連。深可憫念。或係官吏貪酷。朘削窮黎。抑或法制未便。致民失業。果何道以遂其生耶。一坊民生利病。應行應革。爾內外各衙門大小文武等官。念切民依。其各抒所見。毋隱。吏部覆




御史李崇奏例監考補中書三年後即陞部屬進士  
舉人乃遲至十年之久始得官職應行停止將各科  
進士咨取考試得旨各科進士不必拘年分前後人  
數有願考者預行選取堪用者遇缺即補七月上  
躬親大政御太和殿羣臣表賀宣詔天下恩款十七  
條太子太保內大臣蘇克薩哈奏求守陵輔臣等  
稱旨蘇克薩哈不職有何逼迫之處著王大臣議奏  
未幾允議將伊子孫並本旗兄弟俱拿問既而議上  
蘇克薩哈二十四罪俱寔應凌遲處死上不允鰲拜

強奏累日竟坐處絞其子查克旦凌遲處死叔弟姪  
皆斬決奉世祖章皇帝太祖太宗配享園丘方澤  
著於冬至舉行九月雲貴總督卞三元提督張國  
柱李本深合詞請吳三桂仍總管滇黔事務得旨該  
藩以精力日減奏請故允行若令王復理事務恐其  
過勞以致精力大損如邊疆軍機王自應料理十  
月己卯奉天府承德縣地震有聲十一月加上太  
皇太后徽號曰康和皇太后曰誠頌恩天下以世祖  
配天禮成也

康熙七年四月癸巳申刻金星見午位色微暗下詔脩省五月癸丑子時京師地震初七初九十三日未未皆震六月山東地震癸酉金星晝見七月命鄉會試復以八股文取士卓職漕督恭順侯吳惟華密疏請徵各州縣鎮市房號銀兩及江南三十餘州令民納價領種上惡其害民斂財交刑部議罪八月命都統內大臣大學士尚書精奇尼哈番以上各照宴級用棍傘行走護軍統領前鋒統領副都統侍郎各照職掌品級用執事行走九月庚子金星晝見

十一月治理歷法南懷仁劾奏欽天監副吳明煊所造康熙八年七政民歷內閏十二月應是九年正月又一年兩春分兩秋分種種差誤旨會議具奏康熙八年二月議政王等會議前命大臣于十月赴觀象臺測驗南懷仁逐款皆符吳明煊逐款皆錯南懷仁推算九十六刻之法既合天象應自九年始將歷日推行三月授西洋人南懷仁為欽天監監副以其節氣占候符合也四月丁丑幸太學五月拿問輔臣公鼐拜遏必隆阿南達等康親王傑書



東華錄 卷六  
等勘問鰲拜罪款三十。遇必隆罪款十二。班布爾善  
罪款二十三。鰲拜姪塞本得罪六。得旨。鰲拜革職籍  
沒拘禁。遇必隆免罪。草太師及公爵。阿南達免死。宗  
室班布爾善絞。塞本得立斬。阿思哈噶褚哈穆里瑪  
泰璧圖訥莫俱立斬。餘各從輕治罪有差。給還蘇  
克薩哈等原官。及白爾黑圖等官職。六月。禮科給  
事中吳國龍奏。今日百姓誠有如上諭。財盡力窮。民  
不聊生矣。但疾苦固多端。而催科較甚。拯救鮮良法。  
而除豁為恩。請自康熙八年以前。軍民拖欠錢糧。盡

行蠲免。以豁窮黎。尋部議查順治十八年以前拖欠  
錢糧。于康熙四年盡行蠲免。而康熙元年以後拖欠  
錢糧。若再行蠲免。恐不肖有司。知其頻蠲。將已徵在  
官者。作為拖欠。希圖倖免。難以議蠲。旨依議。又左  
都御史馮溥請。收夏稅定于六月。秋糧定于十月。刑  
部侍郎王清請。徵糧之期限於五六月完五分。九十  
月完五分。戶部尚書郝惟訥侍郎艾元徵嚴正矩請。  
將夏稅定于五六月。秋糧定于九十月。徵收。兵部尚  
書王宏祚言。本年存剩之銀。可撥次年春季之餉。請

少寬徵糧限期。云云尋戶部議未便准從旨。這錢糧夏秋徵收本當允行。但國用尚在不敷。俟錢糧充足時。戶部奏請舉行。又御史趙璟遵旨條奏。查順治四年所定官員經費錄內。各官俸薪心紅等項。比今俸銀數倍之多。猶為不足。一旦裁減。至總督每年支俸一百五十五兩。巡撫一百三十兩。知州八十兩。知縣四十五兩。且以知縣論。每月支俸三兩零。一家一日粗食安飽。兼喂馬匹。亦得費銀五錢。一月俸不足五六日之費。尚有二十餘日。將忍飢不食乎。不取之百

姓勢必飢寒。若督撫勢必取之下屬。所以禁貪而愈貪也。夫初任不得已。畧貪小賍。以足日用。及日久賍多。自知罪莫贖。反資大貪。下官行賄。以塞上司之口。上司受賍。以庇下官之貪。打成一片。臣以為俸祿不增。貪風不息。下情不達。庶吏難安。請勅查取原定經費錄額設款項。從長會議。或將本省應徵稅銀。與折納贖銀。加增官員俸祿。得旨該部知道。諭戶部。朕繼承丕基。又安天下。漢滿軍民。原無異視。比年以來。復將民間房地。圈給旗下。以致民生失業。深為可憫。

自後圈結民間房地永行停止其今年所已圈者悉令給還。七月昭雪蘇納海朱昌祚王登聯各賜諡刑部議吳明煊罪旨從寬責四十板。戶部等衙門題為請復存留錢糧以杜私派以安民生事。戶部尚書郝惟訥侍郎文元微嚴正矩遵旨陳奏。康熙七年酌省存留一案在議者以度支勿給一裁減而所得寔多殊不知我朝定鼎以來屢經裁汰見在存留之數萬難再減其地方費用不足勢必仍派諸民貪汙之輩籍口橫加民財愈盡矣即如進表朝覲以及

鄉飲科場等款皆係大典脩理城垣倉庫製造軍器火藥等款皆係要務至於教官馬匹草料一裁則寒毡有步行之苦鋪兵塘馬工食一裁則貪役有枵腹之悲孫貧獄囚口糧一裁則斃獨無以自存而有罪者不得邀矜於法外况各省存留錢糧臣部俱核確應用寔數方准銷算原未嘗任其冒破則七年議裁各款似應於九年為始照舊復其存留至於應裁白糧水脚改徵漕糧折色一欸請勅總漕等確查有無累民可否久行據寔具題可也又刑部尚書朱之弼

題為請復存留錢糧以惠民生事。生民疾苦大事莫過於康熙七年酌省存留錢糧一案。夫存留錢糧原留為地方之用。裁一分則少一分。地方官事不容已。不得不又派之民間。且不肖有司。因以為利。是又重增無限之苦累矣。乞勅部察核康熙七年以前存留數目。仍令存留。則百姓可免重派之累。又御史連國輔題請復裁減各項必需之錢糧。以培國本。以甦民累事。臣伏見康熙七年戶部裁減各項錢糧內。有必不容裁減者。如學道考生員歲季考等銀。舉人進士

盤費匾額等銀。此朝廷作養人材之需也。如鄉飲酒席。此復禮耆老之需也。如修理城垣。此未雨綢繆之需也。他需各官心紅紙張。由單造冊。併看守監倉及鋪兵工食等項。無一非必需之費。一旦悉為裁減。不知既無錢糧動支。又無別項設處。勢必科派民財。以充費用。嗟此三空四盡之餘。何堪此額外誅求乎。乞勅部確查議覆。奉旨該戶部議奏。臣等查直隸各省原額存留銀共一千六百九萬三千八十五兩零。除驛站河夫等銀四百一十四萬一百三十三兩。實原

額存留銀六百五十五萬二千九百五十二兩零。向因兵餉不敷。通共裁過銀三百一十六萬五千三百四十六兩零。尚存銀三百三十八萬七千六百六兩零。又於康熙七年裁銀一百七十四萬四千三百六十九兩零。止寔在存留銀一百六十四萬三千二百三十七兩零。各省除荒之數。俱在此內。臣等會議。其康熙七年所裁各款。自九年為始。復其存留。旨依議。其白狼水脚。每石八錢。并經費等項。照舊全留。又漕米內改折。稜于米十五萬石。不便改折。應仍舊。八

月。康親王等議覆南懷仁等呈告楊光先依附。釐并捏詞。並又將歷代所用之洪範五行。稱為滅蠻經。致李祖白等各官正法。援引吳明煊謊奏。宮誣告湯若望謀叛。情罪重大。應擬斬。湯若望復通微教師之名。得旨楊光先年老。姑從寬免。其天主教除南懷仁等照常自行外。恐直省復立堂入教。仍著嚴行禁止。九月甲午。寅時。京師地震有聲。山東邱縣孝子王昌。詐割肝療父。父病立起。特旨給旌。後不為例。十月。以重脩盧溝橋告成。御製碑文。十一月。大和

殿乾清宮告成。御殿行慶賀禮。上由武英殿移居乾清宮。頒詔天下。恩款十五條。

康熙九年正月。復過必隆公爵。二月。諭刑部。盜案

內論死者甚多。其為誣引株連。亦連有之。宜加詳勘。

至於夾棍。乃慘痛之刑。必不得已而後用。其慎之毋

忽。諭刑部。流徙尚陽堡寧古塔罪人。衣絮單薄。凍

斃於路。甚為可憫。自今十月至正月及六月。俱勿遣。

五月。加上孝康慈和皇太后為章皇后。并祔太廟。

康熙十年五月。給事中姚文然言。江南百姓羣集鼓

廳。保留總督麻勒吉。且云。麻勒吉自被鎖拿。顏黑面

削。臣竊思官列大僚。免冠帶鎖。愧辱難堪。乞特恩寬

其鎖繫。至於所犯事情。審有實據。自有應得之罪。旨

說得是。以後官員犯罪。鎖禁鎖拿。著永行停止。六

月甲午。金星晝見。以故靖南王耿繼茂子和碩額

駙耿精忠襲爵。十二月。召翰林院掌院學士傅達

禮。至懋勤殿。諭曰。翰林院起居注職任重大。關係機

密。朕以爾才品優卓。寔可信任。故行簡用。爾其黽勉

以副朕意。



康熙十一年八月王大臣等議覆御史孟熊飛疏言孫可望係張獻忠餘黨擾亂邊陲後為李定國所敗窮蹙乞降前有重大之罪後無纖微之勞我國家格外殊恩授以義王顯爵及伊身死已襲替二次今孫徵淳故若仍令再襲則後此世世冒濫無已請停其襲替或降封應如所請降授義公得旨公止一義字于例不合著再議降為慕義公十二月召講官等至懋勤殿諭曰漢官中有請令言官以風聞言事者朕思忠愛之言切中事理患其不多若不肖之徒借

端生事假公濟私人主不察必至傾害善良擾亂國政為害甚鉅又諭曰從來與民休息道在不擾與其多一事不如省一事朕觀前代君臣每多好大喜功勞民傷財紊亂舊章虛耗元氣上下訐讒民生日戚深為可鑒

康熙十二年三月上御德殿諭講官曰從來民生不遂由於吏治不清長吏賢則百姓自安矣天下善事俱是分所當為近見有寸長片善便自矜誇是好名也又曰有治人無治法但真能任事者亦難得朕



觀人必先心術。次才學。心術不善。縱有才學何用。平南王尚可喜疏請歸老遼東。得旨嘉獎。官兵家口作何遷移安插。著會議。七月。平西王吳三桂疏請撤藩。得旨嘉獎。官員家口作何遷移安插。著會議。靖南王耿精忠疏請撤藩。旨如前。諭講官曰。朕或出郊外。或幸南苑。翰林官員。遠離家鄉。京城毫無資產。扈從不免艱苦。嗣後所用帳房。一切應用物件。酌定數目。由內府給與。八月。差禮部左侍郎折爾肯傳達禮往雲南。戶部尚書梁清標往廣東。吏部侍郎

陳一炳往福建。經理各撤藩兵起行事宜。九月乙亥。京師地震。十二月。差往貴州備辦夫船芻糗事務。郎中竟務禮員外郎薩穆哈。馳駟回京。奏稱雲貴總督甘文焜言。吳三桂於十一月二十一日。殺雲撫朱國治。以所部兵反。前差往侍郎折爾肯等被留。上名議政王大臣等諭曰。吳三桂已反。荊州乃咽喉要地。著前鋒統領碩岱。海帶。佐領前鋒一名。兼程前往。保守荊州。以固軍民之心。並進據常德。以遏賊勢。其陸續遣發大兵。往剿之處。著速議。川湖督蔡毓

榮疏報。吳三桂反。偽稱天下都招討兵馬大元帥。以  
 明年甲寅為周王元年。貴州提督李本深叛。應之。前  
 差往主事辛珠筆帖式薩爾徒不屈死。總督甘文焜  
 聞變。將十餘騎出貴陽府。至鎮遠。守將應賊圍之。文  
 焜自殺。巡撫曹申吉降賊。賊逼鎮遠。漸入楚境。停  
 撤平南靖南二藩。召梁清標。陳一炳還。奸民楊起  
 隆詐稱朱三太子。糾黨謀叛。約于京城內外放火舉  
 事。官兵往捕。拿獲其黨陳益等數百人。楊起隆逃去。  
 命多羅順承郡王勒爾錦為寧南靖寇大將軍。總

統多羅貝勒察尼都統覺羅朱滿鄂內伯宜理布覺  
 羅巴爾布等。同往湖廣。拿禁吳三桂子吳應熊。詔  
 削三桂爵。宣諭雲貴官員軍民。命都統業赫為安  
 西將軍。同將軍瓦爾達等。由漢中入蜀。護軍統領胡  
 禮布為副將軍同往。

康熙十三年正月。遣都統覺羅巴爾布護軍統領伊  
 爾度齊額司泰。率護軍驍騎先赴荊州。命擴爾坤  
 移駐西安。湖廣督蔡毓榮報。賊兵已抵清浪衛。逼  
 沅州。請大兵馳勅。令提督桑峨疾馳赴沅協守。諭

東華錄 卷六  
兵部近聞京城小民驚恐欲於城外西山處所遷移  
逃避殊非朕安撫百姓之意前令緝獲假稱朱三子  
楊起隆與良民毫無干預並無驅逐居民移居城外  
之事即昨暫閉城門因有人舉首揚起隆匿藏大臣  
之內故行嚴緝非有他故爾百姓勿妄聽訛言致生  
疑畏宜各安生業如平時爾部通行曉諭勒爾錦業  
赫師行改鄂善雲貴總督駐湖廣協剿蔡毓榮  
報賊於十二月二十九日陷沅州總兵崔世祿被執  
澧辰路梗上命順承郡王發驍騎馳赴荊州命

都統尼雅翰為鎮南將軍領德州等處馳防賊兵鎮  
兗州副都統馬哈達席布叅贊軍務侍衛夸塞自  
荊州馳還奏偏沅巡撫盧震棄長沙奔岳州命都統  
朱滿領兵速赴武昌令江寧府將軍額楚鎮海將  
軍王之禰各遣兵防守安慶並勅尼雅翰速抵安慶  
總統諸師馬哈達隨征江寧四川巡撫羅森提督  
鄭蛟麟總兵譚宏吳之茂等以四川叛降賊命總兵  
徐治都還守彝陵以席卜臣為鎮西將軍與副都  
統巴喀德業立守西安援進川大兵以趙國祚為

江西提督王永譽為河南提督。命副都統擴爾坤帥師赴漢中。二月太皇太后出宮中銀幣犒軍。偽總兵楊寶應犯常德。其父原任提督楊遇明為內應。知府翁應兆逆。常德潰。以周有德總督四川。張德地巡撫四川。賊犯澧州。守卒以城叛。提督桑峨等退保荊州。以胡拜為雲南提督。趙賴為貴州提督。胡督報長沙副將黃正卿等以城叛降賊。命都統朱滿馳守岳州。申諭大將軍等嚴禁兵士侵擾百姓。授刑部尚書莫洛為大學士。經畧陝西。

以陝西西控番回。南通巴蜀。恐吳三桂煽亂。人心搖惑。故也。兩廣督金光祖報廣西將軍孫延齡反。自稱安遠大將軍。殺都統王永年副都統孟一茂等。執巡撫馬雄鎮幽之。三月三桂偽將劉之復陶繼智等犯彝陵。額司泰傳作宜。順承郡王遣護軍統領額司泰等擊敗之。賊遁回宜都。以華善為安南將軍。鎮京口。杭州將軍圖喇報耿精忠反。福建總督范承謨罵賊不屈。賊幽之。巡撫劉秉政降賊。鄖陽副將洪福以所部叛。提督佟國瑤擊之。襄陽總兵楊采嘉據穀城。

東華錄 卷六  
叛。以內大臣希爾根為定南將軍。尚書哈爾哈齊副之。統兵赴江西。以討耿精忠。護軍統領桑道吏部侍郎覺羅舒怒。副都統根特巴爾魯席布。參其軍。又以武昌有警。命都統覺羅巴爾布護軍統領伊爾度齊。率師赴武昌。西安將軍瓦爾喀等。敗吳逆偽總兵葉某。克復陽平關。四月。奉使雲南禮部侍郎折爾肯翰林院學士傅達禮。還至武昌。携有吳三桂奏章。上諭王大將軍等。益加警備。仍招致之。賊將陶繼智復犯彛陵。都統鄂內擊破之。調西安副都統


德業立隨征。總兵馬雲程高登科守襄陽。以喇哈達為鎮東將軍。統兵鎮兗州。副都統伯穆赫林甘度海參贊軍務。逮盧震論死。吳三桂子應熊孫世霖伏誅。福建告急。命副都統胡國馬哈達率兵赴杭州。下詔削孫延齡職。尚可喜執吳三桂使人。並逆書奏聞。以阿密達為楊威將軍。鎮江寧。以賴塔為平南將軍。統兵赴杭州。討耿精忠。潮州總兵劉進忠以城叛。降精忠。與續順公沈瑞兵巷戰。遂引賊兵入城。尚可喜奏吳越遣賊二萬屯黃沙河。

恐與孫逆合。請兵以根特巴爾魯為平寇將軍討孫延齡。河北總兵蔡祿謀叛。與楊來嘉通。阿密達擒以聞。伏誅。下詔削耿精忠爵。詔以分遣禁旅。調度情刑。示平南王尚可喜曰。今寧南靖寇。大將軍順承郡王率大軍由常澧進平雲貴。鎮南將軍尼雅翰都統朱滿巴爾布等帥師由武昌水陸進取岳州長沙。直入廣西。都統宜理布等帥師駐彝陵。都統范達禮等駐鄖襄。安西將軍赫業等由漢中進取四川。副都統擴爾坤吳國楨等駐漢中。鎮西將軍席卜臣

等駐西安。復遣尚書莫洛經畧三秦師。大兵居中調度。鎮東將軍喇哈達等於山東河南江南要地控制。安南將軍華善等於京口水陸駐防。揚威將軍阿密達等防守江寧安慶沿江險要。平南將軍賴塔由浙江平定福建。浙江將軍圖喇駐杭州。兼理海疆。定南將軍希爾根等亦由江西平定福建。平寇將軍根特巴圖魯席布等往廣東會王進剿。一切機宜。王共參酌以行。五月。皇后何舍里氏崩。安西將軍業赫等自漢中抵七盤關。破賊于關口。及種子鋪山下。進

抵朝天關。敗三桂偽總兵石存禮於劄閣鋪山下。克復朝天關。平陽兵變。執總兵蔡朝佐以叛。與耿精忠偽將曾養性合。圍瑞安。命將軍賴塔等督兵討之。副都統德業立。大敗叛將洪福於武當山下。六月。遣郎中周襄緒等奉詔往福建。招諭耿精忠。命戶部侍郎達都赴浙江。督理大兵糧餉。授多羅貝勒尚喜為安遠靖寇大將軍。帥師赴岳州。固山貝子準達帥師赴荊州。江西撫董衛國報叛弁祠并勾連閩逆。竊踞廣信諸處。麻蓬地方賊兵繼起。諭定南

將軍希爾根與根特巴圖魯等合剿之。總兵祖宏勳以温州叛。耿精忠偽將李雲龍犯常山開化。金華副將牟大寅擊敗之。斬其偽叅將張雄。命將軍喇哈達鎮守杭州。孫延齡犯柳州。馬雄告急。詔尚可喜金光祖發兵援之。命將軍賴塔進取福建。以陳洪明巡撫廣西。以和碩康親王傑書為奉命大將軍。統兵赴浙江。多羅貝勒董額為定西大將軍。統兵赴四川。冊謚大行皇后曰仁孝皇后。浙江温州羅清黃巖太平諸營相繼叛。詔將軍喇哈達調兵守





台寧。江西巡撫董衛國報。耿逆遣賊李連李太等犯建昌杉關。官兵擊敗之。七月。以郎廷佐總督福建。段應舉為隨征福建提督。叛將劉進忠遣其黨據程鄉縣。官兵擊敗之。復其城。南瑞總兵楊審謀通賊。事覺。伏誅。時精忠陷石城。聲言犯寧都。命將軍希爾根等嚴守贛州。以趙應奎充袁臨總兵。防袁州。精忠偽將閔標犯金華。將軍喇哈達遣副都統鄂申巴圖魯擒斬之。三桂偽將劉之復犯宜都。副都統蘇虎濟等擊敗之。大將軍勒爾錦遣貝勒察尼

將軍尼雅翰等。分水陸進攻岳州。敗賊將吳應麟于七里山。副都統馬哈達雅達理敗賊于金華。浙督李之芳報。賊合力犯衢州。臣兵單可虞。命喇哈達速赴衢州。四川督周有德報。偽總兵彭時亨犯廣元。副將張登科等敗之。董衛國報。閩賊犯寧都。遊擊周球等擊敗之。八月。遊擊周球等復石城。江西饒州營兵變。李之芳報。都司姚世熙等大敗耿逆兵于衢州杜澤大洲等處。又耿逆勾連土賊。從處州逼金華。副都統鄂申陳世凱擊敗之。命總督蔡



毓榮協剿湖南。順承郡王嚴兵守荊州。叛將劉進忠黨劉斌據普寧。我兵進剿。賊迎敵被陷。知縣段藻閉門拒之。復縣城。賴塔報。七月。賊犯金華。副都統喇哈等九戰皆捷。復諸暨義烏二縣。李之芳報。遊擊王世望等敗賊於龍游。副將鮑虎復壽昌。李之芳報。新昌知縣陳大典殺賊全城。紹興知府許宏勳等。備吳良駿等敗賊於城外。賊遁犯仙居。都司汪國祥敗之。命治歷法南懷仁鑄造輕利火礮。以助大軍進剿。海澄公黃梧卒。子芳度偽降賊。募舊兵。斬

言賊見大

賊將劉豹等三人固守漳城。遣間使黃籃以聞。且請速救。詔褒之。令襲父爵。以其兄侍衛芳世為隨征福建總兵官。令同尚可喜進剿。護軍統領桑遏等敗耿逆兵於撫州。襄陽總兵劉成龍下荆南道。石琳率兵攻剿南漳縣。天門寨賊安撫各察洞。官兵復梧州。總兵李榮剿賊金華。焚其木城。副將鮑虎破賊五營。復淳安。賊圍黃巖甚急。又寧海象山新昌餘姚四縣。賊眾蜂起。請速救。台州保寧海。旨著將軍賴塔喇哈達商酌。飭隨營蒙古兵違法掠民者罪

死。江西官兵復萬年縣。浙江副將鮑虎復遂安。參將洪起元復嶧縣。命護軍統領桑過移師駐袁州。上諭王大臣聞岳州三面臨湖賊於陸路一面浚濠築壘據守頗堅。詔將軍尼雅翰移師江西與副都統甘度海等合兵自袁州進取長沙夾攻岳州。兩河提工告竣加河道總督王光裕兵部尚書銜。李之芳報副都統胡圖副將王廷梅敗賊於石梁大溝源。總兵李榮復東陽。

官版見本

東華錄卷六

